

longi decursus, multum circumambiente terram Oceano.

Oppida.
Wick.

Celeberrimum his locis oppidum *Wick*, ad Orientalem oram objectum Oceano, portum habet navibus satis tutum: hic commercia exercentur. Alterum est objectum Septentrionibus in exiguo sinu, portu & statione fida, *Thurso* loco nomen est.

Thurso.

Arces.
Villae.
Vici.

Multæ per omnem regionem arces, villæ, vici (namque provincia hæc populosa satis est) secundum locorum opportunitates hic illic sparguntur, quædam cultioribus ædificiis non aspernendæ. At loci genius, & incolarum ingenium, epulis ac comotationibus indulgere, suaviter & hilare in diem vivere, quam substructionibus animum appellere suadet. Castrum *Sinclari*, olim *Gernigo*, Comitum arx non procul *Wicko* oppido primas tenet, & in hujus vicinia *Akergill*, non ita pridem ad *Kethorum* familiam spectans, nunc ad hos Comites devoluta, propter alterius viciniam negligitur. Ulterius paulum progressis arx *Kees* visitur ea quoque Comitum est, amœnæ & jucundæ habitationis. Est in arctoo littore paucis miliaribus à *Dungisby*, *Maja* arx *Sinclariorum* familiæ; eorundem itidem in australi ora est *Dunbeth*, firma arx, rupim isthmo super ædificata, & huic vicina *Berridall*, ad Comites spectans. Est quoque *Dounra* in littore ad occasum sita. Sunt & multa alia non spernenda ædificia, quorum nominibus recensendis immorari non est operæ pretium.

Sinclari.

Akergill.

Kees.

Maja.

Dunbeth.

Berridall.

Dounra.

Vicecomitatus.

Regio hæc Vicecomitatus per se ut dixi habetur, isque Comitum hæreditarius est: quando & quomodo id acciderit, in superioribus memini.

Familie,
Sanclaria.

Omnium familiarum quæ cognomen *Sanclari* referunt, jam ab antiquissimis temporibus, *Baro Sanclarius*, de *Ravens-heuch* (ut in *Fifæ* descriptione attigimus) Princeps habetur. Cæteræ eorum familiæ per *Zetlandiam*, *Orcadas*, *Cathanesiam*, *Fifam*, *Lothianam* late disseminatæ, huic originem suam debent. Ejus majores *Zetlandiam* & *Orcadas* Comitatus titulo tenuerunt, affinitate etiam *Regiæ Danorum* domui (ducta in uxorem eorum filia) juncti: sed cum unius mala administratione (qui *Guilielmi* profusoris nomine ob id apud posteros audit) his provinciis excidissent, mansere tamen in iis Insulis plurimi nobiles privati, hodieque manent, ea familia editi, quibus Comes *Cathanesius* suam originem debet, qui nunc propaginem suam per hæc quæ describimus loca, late dissevit.

Alie.

Sunt hic etiam multæ aliæ antiquæ ac illustres familiæ, quarum quædam raro in latifundiis suis lares fixere, cum aliorum locorum indigenæ sint. *Kethi* de *Innerogy* è *Marescallana* familia editi hic multa prædia possederunt. Eorum hæreditate crevit non ita pridem illustrissimus Comes *Marescallus Ketho-*

rum familiæ princeps, qui iis prædiis postea pactis conditionibus cessere *Moweti*, aut verius de *Monte Alto*, qui hodie in his locis avita prædia tenent. Indigenas minores familias recensere longum esset.

Non exigua hujus Comitatus portio de Episcopo in feodo ac *Emphyteosi*, non ita pridem tenebatur, quæ nunc *fisco* cessere.

Thursum oppidum prætervecto nulla amplius urbs, nullum oppidum, quam longe hæc universa regni ora occidua porrigitur, occurrat, donec *Britannodunum* in intimo recessu æstuarii *Glottæ* appellas: adeo ad hunc vitæ mansuetioris cultum (qui in urbibus frequentior) hebescent incolarum ingenia, qui priscam linguam & veterem parsimoniam mordicus sectantur. At vere æstimanti hoc inertia potius, quam veterum imitationi dabitur. Non desunt certe multis locis urbium locandarum opportunitates, portus maximi, tutissimi, capacissimi; maria omnigenis piscibus plena; terra fecunda, & messibus ac pecori apta; ac flumina vecturæ idonea: at his omnibus ignavia parceret, & incolæ ut plurimum pecore victitantes dominati ibidem aluntur senescuntque, unde ora hæc exteris omnibus, imo nostris minus cognita, à paucis videtur, aut commerciiis exercetur. Non sum nescius nonnullos huic moli pares locandis urbibus animos appulisse; at cum jura, libertates, urbibus solitæ (sine quibus illæ stare non possunt) paterentur, quanquam sanctiones in id promulgatæ invitarent, votorum impotes eam curam abjecisse.

CATHANESIA,

EX CAMBDENO.

Superius *Cathanesia*, vulgo *Catness*, jacet mari Germanico objecta & numerofo littorum ambitu inflexa, in qua *Ptolemæi* ætate *Catini*, sed perperam in exemplaribus *Carini*, apud quos ille idem *Ptolemæus* illam fl. statuit, qui hodie *Wisle* videatur. Hujus incolis ex pecore pascendo & piscando maximus est proventus. Præcipuum castrum *Girnego* dicitur, in quo *Cathanesie* Comites plerumque agunt. [Nomen hoc mutatum in *Castel Sinclair*.] Episcopalis sedes est in *Dornok* obscuro alioquin viculo, ubi etiam sedem Vicecomiti *Cathanesiæ* constituit *Rex Iacobus Quartus*, vel ad *Wick*, prout res postularent.

Carini pop.

Ille fl.

ADDIT.

Cathanesie Comites iidem olim erant qui etiam *Orcadam* Comites, sed tandem divisi, perque *Malissii* cujusdam filiam primogenitam datam in uxorem *Guilielmo* de *S. Claro* vulgo *Seincler*, *Regio Panitario*, ejus posterii hunc honorem Comitum *Cathanesiæ* sunt adepti, & eodem etiamnum latantur. [Et nomen ut supradictum *Girnego* mutarunt in nomen familiæ suæ.]

Cathanesie Comites.

ADDIT.